



## KEMENTERIAN KEWANGAN

### **SURAT PEKELILING PERBENDAHARAAN BIL. 4 TAHUN 2007**

Semua Ketua Setiausaha Kementerian  
Semua Ketua Jabatan Persekutuan  
Semua Setiausaha Kerajaan Negeri  
Semua Ketua Eksekutif Badan Berkanun Persekutuan  
Semua Pihak Berkuasa Tempatan

#### **PINDAAN KE ATAS ARAHAN PERBENDAHARAAN (AP) 150**

Surat Pekeliling Perbendaharaan ini bertujuan untuk memaklumkan pindaan ke atas Arahan Perbendaharaan (AP) 150 mengenai tempoh penyimpanan buku akaun dan rekod kewangan serta perakaunan sebelum ia dimusnahkan.

2. AP 150 menghendaki selepas pengauditan akaun tahun berkenaan oleh Ketua Audit Negara, buku dan rekod kewangan serta perakaunan disimpan dengan cermat sekurang-kurangnya selama tempoh yang ditetapkan di Lampiran M yang sedia ada. Tempoh minimum yang ditetapkan ialah di antara satu (1) tahun dan 20 tahun.

3. Mengikut arahan sedia ada, bagi penyimpanan Baucar Pembayaran Beresit dan Baucar Jurnal yang disediakan secara manual, mesin, komputer atau dalam apa bentuk sekali pun atau direkod dan disimpan secara mikro grafik atau media elektronik yang lain, tempoh minimum penyimpanan ialah selama tujuh (7) tahun. Memandangkan jumlah baucar dan jurnal yang perlu disimpan terlalu banyak dalam tempoh yang panjang, wujud masalah tempat penyimpanan. Sehubungan itu, langkah penambahbaikan telah diambil bagi mengatasi masalah tersebut di mana tempoh penyimpanan dipendekkan bagi baucar-baucar yang tertentu. Bagi penyimpanan buku akaun dan rekod kewangan yang lain, tempoh minimum masih dikekalkan seperti sedia ada. Tempoh tersebut telah mengambil kira pengauditan oleh Ketua Audit

Negara dan keperluan siasatan. Selepas tempoh yang ditetapkan, buku dan rekod kewangan serta perakaunan hendaklah dimusnahkan.

4. Maklumat terperinci mengenai tempoh penyimpanan tersebut adalah seperti di Lampiran M yang disertakan. Lampiran M yang baru ini adalah menggantikan Lampiran M yang sedia ada. Bagi mengambil kira perubahan terhadap tempoh minimum penyimpanan buku dan rekod kewangan serta perakaunan, AP 150 adalah dipinda seperti berikut:

"150 (i) Semua buku dan rekod kewangan serta perakaunan termasuk rekod di dalam bentuk mikro grafik atau media elektronik hendaklah disimpan dengan cermat sekurang-kurangnya selama tempoh yang ditetapkan di dalam **Lampiran M**. Tempoh ini telah mengambil kira pengauditan oleh Ketua Audit Negara dan keperluan siasatan. Buku dan rekod kewangan serta perakaunan hendaklah dimusnahkan selepas tempoh minimum penyimpanan. Bagi tujuan pemusnahan buku dan rekod kewangan serta perakaunan termasuk rekod di dalam bentuk mikro grafik atau media elektronik, kebenaran hendaklah diperolehi terlebih dahulu daripada Ketua Pengarah Arkib Negara dan Ketua Audit Negara sebelum memohon kelulusan daripada Akauntan Negara atau Akauntan Negeri/Bendahari Negeri. Permohonan hendaklah memberi maklumat mengenai jenis dan tempoh simpanan dokumen yang hendak dimusnahkan tersebut.

Penyimpanan dan pemusnahan buku dan rekod kewangan serta perakaunan


(ii) Bagi pemusnahan semua buku dan rekod kewangan serta perakaunan termasuk rekod di dalam bentuk mikro grafik atau media elektronik yang tidak tercatat di **Lampiran M**, kelulusan Ketua Pengarah Arkib dan Ketua Setiausaha Perbendaharaan atau Pihak Berkuasa Kewangan Negeri hendaklah diperolehi terlebih dahulu selepas pengauditan tahun berkenaan oleh Ketua Audit Negara. Bagi pemusnahan semua buku dan rekod kewangan serta perakaunan termasuk rekod di dalam bentuk mikro grafik atau media elektronik tersebut di atas yang di bawah bidang kuasa Negeri Sabah dan Sarawak, kelulusan hendaklah juga diperolehi dari Arkib Negeri Sabah dan Pustaka Negeri Sarawak.

(iii) Bagi buku dan rekod kewangan serta perakaunan yang disalin ke dalam bentuk mikro grafik atau media elektronik, pemusnahan boleh dilakukan selepas memperolehi kelulusan pihak tertentu yang dirujuk di subperenggan (i) dan (ii)."

5. Surat Pekeliling Perbendaharaan ini berkuat kuasa dengan serta merta.

**"BERKHIDMAT UNTUK NEGARA"**

Saya yang menurut perintah,



(Tan Sri Izzuddin bin Dall)  
Ketua Setiausaha Perbendaharaan

27 Februari 2007

s.k. Ketua Setiausaha Negara  
Ketua Audit Negara  
Akauntan Negara Malaysia  
Semua Pegawai Kewangan Negeri

## LAMPIRAN M

[Arahan Perbendaharaan 150(i)]

### TEMPOH MINIMUM BAGI MENYIMPAN BUKU DAN REKOD KEWANGAN SERTA PERAKAUNAN

Buku atau Rekod	Tempoh minimum penyimpanan
1) Lejar dan Rekod Khas, contohnya, Daftar Pinjaman Pejabat Hutang Awam dan Daftar Pindah Milik.	20 tahun selepas penyelesaian akhir segala urusan dan penutupan akaun terakhir dalamnya.
2) Lejar Perakaunan Utama Perbendaharaan, Buku Wang Tunai, Jurnal Besar, Ringkasan dan Lejar Kecil.	7 tahun selepas penyelesaian akhir segala urusan dan penutupan akaun terakhir dalamnya.
3) a) Sistem Perakaunan Secara Manual	
i. Baucar bayaran dengan kontrak.	7 tahun
ii. Baucar-baucar lain.	4 tahun
b) Sistem Perakaunan Secara Elektronik	
i. Penyimpanan dokumen secara <i>hardcopy</i> termasuk baucar bayaran dengan kontrak.	4 tahun
ii. Penyimpanan dokumen secara <i>softcopy</i>	7 tahun
4) Penyata Pemungut termasuk resit rasmi pendua.	3 tahun
5) Buku Wang Tunai Harian, Buku Bayaran Pos dan sebagainya.	1 tahun
6) Pendua atau Kaunterfoil dalam bentuk buku.	Selepas penyelesaian akhir tindakan atas segala borang asal.
7) Laporan atau <i>listing</i> kecil komputer atau maklumat berkenaan yang direkod dan disimpan secara makro grafik atau media elektronik lain.	Selepas penyelesaian akhir tindakan atas laporan atau <i>listing</i> kecil komputer.